

四庫全書

史部

欽定四庫全書

明名臣琬琰錄卷十八

明 徐紘 撰

少師工部尚書追封莊平伯榮襄吳公神道碑銘

楊士奇

公諱中字司正姓吳氏世家山東之武城業儒曾祖淵
祖興仕元為任邱令考成皆以公貴累贈榮祿大夫正
治上卿少保工部尚書曾祖妣某氏祖妣某氏妣某氏皆

贈夫人公洪武戊寅自國子生授營州後屯衛經歷陞太寧都司經歷太宗皇帝義旗所指師至大寧公以衆出迎公體白潔豐偉應對明暢上一見拔於羣衆中賜襲衣命守會闕

力田南兵攻城率衆卻之移守薊州捍禦撫綏具有方畧賜衣服器物以嘉獎之遂命署北平布政司理問陞本司經歷給饗運贊城守並效勞績陞大理寺丞是歲旱蝗公言此由刑濫所致皆臣等之過乞法司務寬平無幾陞少卿以發奸慝陞都察院右都御史將營北京宮殿改工部尚

書奉命取材於蜀還又命董餉運北京賜帛六百疋車駕北
征公扈從兼督餉運既還丁外艱歸起復仍命督宮殿
營繕公言營繕吉事臣喪服未除非所當預改刑部尚書
後以言事忤旨逮繫仁宗皇帝嗣位尤見信任陞少保兼
尚書賜寶帶金織衣已而坐累解少保公事三聖皆見信
任凡車駕行幸不以遐邇皆在扈從三陵之建皆公董役
竣事皆有銀幣之賜皇上嗣位以公舊老復少保重建
奉天華蓋謹身三殿乾清坤寧二宮命公董之蚤暮勞

勤致疾功成公雖在告嘉念厥勞陞少師賜白金文綺
加繡麟衣無幾疾竟不起正統壬戌六月丙辰公訃聞
輟視朝一日遣禮部尚書胡濙賜祭追封莊平伯賜謚
榮襄命有司治葬官其子賢世襲錦衣衛百戶公為人
和易聞喪勤於奉公其掌刑憲寬厚平恕躬視獄中
命除穢惡疎桎梏時食飲戒飭吏卒以時寬恤進遷人
官職務填委規措經回條理井井心之默識雖久不忘
褻度有容雖忤不較或屈已伸謝愛護僚屬恒掩瑕疵

其佐在南京者常賦造海艘材於江西浙江竟至加數十倍時論謹譁公聞駭愕遽奏罷賦悉給於公屬官有器能者率獎進之尤事蓄財以應時需隨用皆足未嘗缺乏自正統來京師多大營建悉出公家有司不知百姓不聞此本皇上之仁亦公預贊畫焉明於燭奸嘗四鼓八朝道遇負鈔數十萬緡者公曰非寇而何命從者悉執以奏詰之迺造鈔匠盜鈔實提舉司鈔遂置於法邂逅以見必上聞不以出位為嫌歷事四聖皆承厚遇

所得賜賚時鮮與擬宣德中嘗賜銀章其文曰和敏詳
達蓋以貺公之行云所得書詩圖畫尤多自念久病奏
乞停祿不允家居事親孝敬常迎就養京師脩極崇奉
親沒致御祭之榮永樂中命大臣之子入侍皇太孫公
推於其弟雖貴待姻戚鄉黨待相與款洽如布素時賙
窮恤匱不問識與不識與人處謙和怡愉大官中貴皆
樂親之屬續之日哀悼之衆無間疎戚享年七十有一
塋良鄉縣某鄉之原配劉氏封夫人子男七子與公同

朝交四十年至是賢奉少保江陵楊公所誌墓文求書墓道之碑遂並以予所知者序之而為之銘銘曰奕奕英公興自成均發軔伊始感會風雲英氏之服從師于邁攄勤効謨夙夜靡懈乃進棘寺乃陟栢臺隆隆寵光亨衢弘開正法以施秉公持平遇灾引咎帝嘉乃誠遂掌邦禁詰奸刑暴惟欽惟恤恭帝之詔再入冬官加右司空居民恃利飭材考工鞠躬致誠厯事四聖陟降左右式恒厥敬廷多其績時偉其望巖巖師保六官之上

曷不憊遺而遽長歸七十高齡于古已稀壽富考終亦既寧止史氏有銘詒厥來嗣

兵部尚書張公墓誌銘

楊士奇

公諱本字致中姓張氏山東東阿人曾祖欽祖誠考從善洪武中公自國子生擢揚州府江都知縣陞揚州知府遂陞江西布政司左叅政召為工部左侍郎坐累謫交趾還為刑部右侍郎陞南京兵部尚書兼都察院事召為行在兵部尚書兼太子賓客兼戶部事公少勤學

治毛氏詩為人直諒通敏有器識初在江都治其縣有法
豪猾斂肅雖上官素悍暴者不得下擾江都之民安之太宗
皇帝義兵及境衛府皆已歸附公猶率民治守其母夫人曰
此天命也可違天以禍人乎遂率民耆老詣軍門朝內難平
陞知府進參政賜白金文綺是時江西唐琮在都司劉辰在
布政司周觀政為按察使三人皆負勁氣不相下琮觀政尤縱
私無忌憚事連軍民者即各持說務已勝不復揆理有積滯
數月不決者公至斷斷持正且溫辭和氣以導之久而三人者皆

惟公言之聽吏弊素甚公每事躬理吏無容奸聲譽頓起
遠郡邑民事當貳佐躬臨視者衆或憚行輒自請行所過
民多德之為工部職務叢脞旦暮在公悉心殫慮寢有條
理在刑部奉命督北京河運至濟寧而病朝廷聞之
遣中官挾醫馳視并賜藥及貂裘竣事還益持敬慎
議獄必究情疑者處之率厚數發奸擿伏奇中而經理
秩秩仁宗皇帝初嗣大位重南京根本重地曰張本特
立不阿首進公南京兵部尚書兼都察院事明年被召

八見言國家大計遂留行在兵部毅然以革弊舉廢為務
皇上嗣位知公忠直可任所言多見聽納高煦反車駕
親征罪人既得命公撫輯其衆而錄其餘黨兵政久弊
奸人以貨脫伍籍而援平民實伍者遠邇一轍公言於
上擇廷臣四出清理悉用釐正於他弊尤多賜勅獎諭
命兼太子賓客賜白金文綺鞍馬遂命兼戶部事戶部
政紀尤弛公夙夜不懈講求其故蠲其積弊舉其墜典
凡上利國家下利民生者靡不盡心事日益就緒宣德

六年正月六日得疾又明日訃聞上深悼惜遣禮部尚書胡濙賜祭遣中官賜賻鈔三萬緡勅工部營喪葬戶部復其家比葬復遣官賜祭卿大夫士之賢者皆走哭弔致奠祭又相與歎曰一世居高位享厚祿而能任國事如家事如張公者幾人天胡奪張公之速哉公廉介有守其心未嘗斯須不在國事剛果嫉惡於治奸宄鮮寬假而禮賢敬儒尤厚春秋六十有五而卒卒之日家無餘貲亦可以親其平素矣以公貴祖若考皆贈資善

大夫兵部尚書祖妣李妣丘皆贈夫人配王封夫人子
男二璘環孫男三承祖繼宗如意保公葬以卒之歲某
月某日墓在東阿先塋之次璘等以右通政徐琦所狀
事行來請銘余與公兩京交好殆三十年又悉其江西
之政蓋琦知公不若余之深也銘曰重秩重祿偉公與
卿魏冠褒衣蟬聯在庭孰如張公經國如家夙夜弗遑
勞思孔多何以益上何以益下曰予時職其敢遑暇焯
焯成績在公多有倚任方隆公止下壽廉清之操公正

之施賢人之喪善人之思

少師忠定蹇公墓誌銘

楊士奇

宣德十年正月十有五曰少師吏部尚書蹇公薨於位
先四曰以疾聞上遣太監范弘以醫來視賜鈔萬緡明
日范太監以衆醫偕來又明日疾革范復來問所欲言
對曰陛下初嗣大寶義獨寡祐不能効分寸裨益然區
區天馬之誠所望於聖明者惟敬守洪武成憲始終不
渝耳言已而絕訃聞上深悼歎屬時國有大事悉停諸

祀特賜鈔萬緡勅工部治喪葬贈公特進光祿大夫太師謚忠定遣官賜祭而官其長子英英等奉觀歸葬有日求予為銘予與公同朝三十有五年而事仁宗皇帝自登儲至大位始終皆陪公公國家老成人所以啟蒞士奇蓋多不敢辭蹇氏世家重慶之巴縣宋以來多顯仕自公高曾以下始隱居不出曾祖繼祖妣年祖均壽妣雍考源斌妣胡繼羅以公貴贈曾祖祖考皆榮祿大夫少師吏部尚書曾祖妣祖妣妣皆夫人公諱義字直

之生而岐嶷長端重不好弄而嗜學弗懈始從里社師
中書左丞殷祐時為郡守一見異之引充郡學弟子員
語其師曰是兒將來遠到非吾所及當成就之而公不
煩程督日益有進洪武甲子中四川鄉試明年中禮部
會試廷試賜同進士出身擢中書舍人授徵士郎見重
太祖高皇帝每前奏事率稱旨而數見獎賚初名瑤一
日奏事畢問汝蹇叔之後乎親灑宸翰書義字賜之以
易舊名時丁羅夫人憂賜道里費且命馳駟歸蓋特恩

云服闋仍舊職滿三載吏部奏當調特命終九載朝夕
左右凡機密文字必以付公而小心敬慎久而愈篤建
文中陞吏部侍郎授嘉議大夫太宗文皇帝入正大統
轉左侍郎數月陞吏部尚書授資善大夫時政令制度
有非洪武之舊者詔悉復之公從容為上言損益貴適
時宜間舉數事陳說本末文皇帝以公忠實悉從其言
小人有譖公不忘建文者賴上聖明不聽有除官不得
善地訴公者上皆斥之永樂二年冊仁宗皇帝為皇太

子命公為詹事時師傅皆以勲臣兼之而輔導責任文
臣詹事蓋元僚也上欲有諭皇太子率諭詹事往導意
公亦委曲周悉皇太子尤愛重公所言靡不信用滿三
載陞資政大夫七年車駕巡狩北京命皇太子監國中
外庶務惟諸王及遠夷有奏請詣行在餘悉啟聞處分
公熟於典故達於政體孜孜無倦不動聲色而事賴以
濟賜詔以其官秩封贈二代滿九載賜勅有秉心正直
及淳良篤實裨益國家之褒數奉命兼禮部事雖職務

填委處之裕如十七年丁父喪歸上及皇太子皆遣官賜祭皇太子贈賻尤厚有詔起復公詣北京謝上慰勞再三賜鈔千緡遣中官護送歸南京明年從皇太子朝北京遂命公巡撫直隸應天等府州問兵民休戚及文武吏之賢否而升黜之謂國家多事之際悉以法繩吏人將不勝特黜其太甚者數人餘多見寬貸而兵民吏弊當建革者具奏行之仁宗皇帝初嗣位一切政議預者三四人而公居首進少保兼吏部尚書二俸俱支賜冠

服象笏及玉帶二遂進少傅又進少師賜師傅之臣銀章各一其文曰繩愆糾繆公首被賜上諭之曰朕有過舉卿即具疏用此封識進來蓋望公等匡直也繼賜誥授榮祿大夫封贈三代及妻於公數人誥詞上特增曰勿謂崇高而難入勿以有所從違而或怠所以望公等者至切也又念公侍從監國舊勞製特褰忠貞印賜之其賜勅有以善翊君勞心焦思二十餘年夷險一致之褒時修太宗皇帝實錄命公監修宣宗皇帝嗣位一切

政議屬公數人如仁考之初繼奉命監修仁宗皇帝實錄書成賜白金文綺鞍馬扈從往庶人高煦還寵賚尤厚後從巡邊既還以公年老不欲煩以有司之務賜勅曰卿事祖宗積効勤誠朕嗣統以來尤資贊輔夙夜在念圖善始終蓋以卿春秋高尚典劇司優老待賢禮非攸當況師保之重寅亮為職不煩庶政乃副倚毗可輟吏部之務朝夕在朕左右相與討論至理共寧邦家卿其專精神審思慮益致嘉猷用稱眷倚老成之意繼賜

銀章一其文曰忠厚寬宏以益褒德云賜新第於文明門內寵錫渚加吏部言公歷少師九載降勅褒諭仍賜宴禮部是歲生日賜白金文綺是日齋宿於公所疾越五日竟不起享年七十有三公為人沈深質實和厚簡靜內有孝友之行事君有誠處人有量無所拂逆未嘗輕涉一語傷物至於議法亦不苟為包含必歸中正歷事五朝凡五十年所履坦坦無一日顛躓之憂退朝之暇手不釋卷貴而能謙富而能約上前所言未嘗退以

語人蓋天下有陰被其利者矣士奇嘗竊論之魯簡肅
之忠實不欺李文正之不為傷人害物張忠定之不飭
玩好傳獻簡之遇人以誠范忠文之不設城府公蓋兼
有之矣元配劉氏繼張氏皆封夫人子男四長英次芳
次芸次荃英荃皆尚寶司丞男孫四霖震霑露公之葬
以薨之歲某月某日墓在巴縣某鄉某原先塋之次銘
曰節乎蜀山浩乎蜀川孕精毓靈挺生偉人溫中穆外
履夷蹈素皇明麗天奮躍自下在帝左右秉公與誠掌

帝之制播告四方進貳天官遂職冢宰簡用俊良往興
至理帝命洊隆俾輔聖儲陳厥謀謨聖罔弗俞四紀在
廷三翼升御肅肅師臣秉王之度一念惟仁永矢不渝
寅畏小心保終猶初陰利逮人人則罔覺惟帝昭明褒詔
有數嗚呼忠定維國老成曷不憇遺翼我聖明生榮死
哀死且不朽昭德刊辭永告爾後

戶部尚書郭公墓誌銘

楊士奇

宣德六年四月十一日資政大夫行在戶部尚書棠邑

郭公卒訃聞上悼歎賜祭命有司給舟歸喪且營葬事
公諱敦字仲厚姓郭氏其先自太原交城徙東昌棠邑
祖諱忠妣石氏考諱政寬妣侯氏繼馬氏郭世有善德
公自幼凝重端謹稍長游鄉校日勤講習已卓卓出倫
輩洪武癸酉以詩經中山東鄉試會試下第後擢戶部
廣西清吏司主事歲餘有賢聲陞衢州知府下車咨民
隱蠲弊興利修學政務教化崇儒術禮賢行以表勵其
民振卹無告郡俗貧死不能葬者焚屍沈之公相城東

得廢地百餘畝榜曰義阡令民貧死者悉葬是又為約教民有急相資助民利賴之嘗歲旱公齋沐致禱雨立降霑足蝗入境為灾公自為文檄城隍神是夕大雨雷電蝗盡死凡所禱輒應城西有淫祠歲四月軍民男女聚謁祭祠下譁譁若狂公禁止之已而得風眩疾吏民爭勸罷禁弗聽疾亦瘳同僚有私取民財者公雖不面斥而義形於色其人頓首謝改過待之如初屬邑吏爭濯磨自効公退所謀諸心發諸言未嘗不在民事所秉

正直襟宇坦明言出而民信令出而民從不俟程督庶
務畢舉舍內蠶箔嘗有叢絲類織成鞞帶脩廣適度郡
人謂公仁政之應在衢七年政化大行坐累徵詣京師
耆老數百人伏闕奏乞留理官報不可耆老皆涕泣而
退後廷臣有言公廉正不阿者召為監察御史陞河南
布政司左叅政無幾調陝西以公務留京師今禮部尚
書胡公言其行於太宗皇帝曰郭敦有大臣體宜在左
右即日召見以病不克入遂遣御醫視疾病愈入謝獎

勞再三賜鈔襲衣明日陞禮部右侍郎兼太僕寺卿仁
宗皇帝臨御進官戶部左侍郎兼詹事府少詹事賜誥
以其官贈祖若考而贈其祖妣妣皆淑人宣德二年陞
戶部尚書命鎮陝西歲餘召還在戶部無敢一毫干以
私者未幾得疾上聞之命太醫往視數日竟不起春秋
六十有二為人純實溫雅事親愛敬兼至隆寒盛暑不
懈閨門之內儀度清肅聲色未嘗留耳目公暇手不釋
卷私居無隋客居官剛正人莫能奪所至整飭綱紀盡

誠撫恤不徐不亟吏畏民懷冰蘖之操無遜古人雖列
官六卿汨然布素身沒之日家無餘貲豈非篤行君子
者乎子男五人曰祺貞禧裡祐孫男女皆六於是諸孤
奉衛府長史金實所狀事行介禮部尚書胡公求塋銘
噫行為如公銘其何愧銘曰君子之德惟正故直惟公
故碩惟澹故適于道之迪于民之則嗟乎郭公允備衆
好嗟乎斯銘無愧有道

太子少保文靖金公墓誌銘

楊士奇

太子少保禮部尚書兼武英殿大學士金公以宣德六年十二月十六日訃聞上嗟悼甚至贈榮祿大夫少保謚文靖命禮部尚書胡公賜祭文命自喪至祥禫皆遣官祭勅有司治喪葬百需所以褒寵之厚且備矣公諱善字幼孜以字行自幼嗜學問內承家訓之篤長從前進士聶鉉先生授春秋經得其微旨中進士乙科授戶科給事中太宗皇帝初臨御注意文學士改翰林檢討居無幾簡翰林之臣七人處之內閣付以密務而兩制悉

歸焉七人者廬陵解大紳胡光大永嘉黃宗豫南昌胡若思建安楊勉仁與士奇也數月皆陞官公為侍講授承德郎仁宗皇帝在東宮時翰林春坊司經局之臣日講經史公專說春秋數析簡明睿旨稱善遂命纂十二公事作春秋要旨三卷以進永樂五年陞右春坊右諭德仍兼侍講授奉訓大夫七年車駕巡狩北京公與光大勉仁同扈從八年扈從北征還南京陞奉直大夫十年賜誥命贈其考守正為右春坊右諭德母陳為宜

人封母羅為太宜人贈妻孔為宜人十一年扈從巡北
京從征北方十二年復從北征陞翰林學士仍兼諭德
輯五經四書性理大全為總裁官授奉議大夫十四年
還南京明年扈從巡北京預修太祖皇帝實錄十八年
陞大淵閣大學士仍兼翰林學士二十年扈從北征二
十二年復從北征既旋師中道宮車晏駕初喪至斂皆
勉仁與公據禮行之既而勉仁先驅歸報道中之儀皆
洛公而行仁廟嗣位進戶部右侍郎兼文淵閣大學士

翰林學士踰月陞太子少保兼武英殿大學士專典內
制賜大臣五人銀圖書其文曰繩愆糾謬蓋以匡直勉
之公其一也奉命持節冊封趙王妃及封梁王洪熙改
元命兼禮部尚書三俸並支大臣兼三俸者惟勉仁與
公二人賜誥命授資善大夫贈其祖仲卿及父皆太子
少保武英殿大學士祖母周母陳皆夫人進封母羅太
夫人贈故妻劉繼室屠皆夫人以法司論死罪多冤抑
命自今臨決必會大學士三人同審而公預焉詔百官

親有違離三年以上者聽給告歸省公首奏歸省母蓋
前此百司職務填委無敢言私至是公首奉詔賜賚甚
厚是歲丁太夫人憂上嗣位修兩朝實錄起公為總裁
官明年奉命持節之寧夏冊封安化真寧二王妃歷河
南關東西之境弔覽周秦漢唐以來遺墟故趾悉見賦
咏所過兵民休戚既還具言於上實錄成賜金織襲衣
文綺白金鞍馬是歲扈從巡邊至宣府而還歲餘得疾
上遣太醫院官視療數月竟不起春秋六十有四公為

人簡易沉默溫裕有容居家敦孝友之行既仕事上以誠持論必正扈從北征時道中士卒有憊者太宗皇帝知之以問羣臣羣臣未有對公直對宜遂班師凡於公務致勤不倦處同僚能讓於人汎愛無忤其學該博文章和平寬厚類其德性四方求者無虛日靡不酬應得一篇一咏者皆寶重之書兼工真行嘗考會試者一讀廷試者者四不伐善不驚名初陞學士寵賚日加即以盛滿為戒名其燕處之居曰退菴疾革士奇勉仁問之

有何言公言受國重恩上無所益朝廷下無所益生民
何言旁或啟之請身後之澤者公正色曰君子所恥訖
終清明未嘗片語涉亂既卒自公俟六卿暨諸司之長
皆哭弔奠祭士庶賢愚皆有喪善人之嘆嗚呼儒者際
遇始終光榮如公一世其幾何人公之所存蓋無忝矣
子男五長昭伯宣德三年進士次武伯堅伯文伯壽伯
孫男六公葬以卒之明年某月某日葬在某縣某鄉某
原銘曰玉筍崔嵬金川湛澄公生其間萃秣挺英賓興

賢能濟濟偕至青萍出匣淬礪初試六御乘時登庸玉
署清邃崇嚴叅與密務恪勤夙夕小心寅恭于狩于征
龍旂率從上承簡知履坦平平鷗游滄溟鵬翔九天歷
事三聖敬終猶始不競不綏有譽無毀方簡大冊天府
所載崇碑厚碣敷在四方謙退之存易簣不貳嗚呼文
靖可式有位

少保戶部尚書黃公神道碑銘
楊士奇

自古仁人君子之明夫道者恒以天下國家為心而不

為其私計范希文言士當先天下之憂而憂後天下之樂而樂夫天下之懷抱斯志者未嘗無人顧其志得行與否則係於其所遇以希文之志猶不得盡行於當時非所遇之難乎惟士之卓然有志者則不以是而或怠然亦鮮矣三十四年間士奇所接名卿大臣若東萊黃公其可謂有志於希文而無愧者也公稟剛毅之資持正直之節懷忠厚之志負遠大之器風采凝重氣量弘偉而表裏洞達博學好古篤信不疑不苟為同不矯為

異不為勢屈不為禍懾惟義之循惟道之行豈非士之卓
然者歟公諱福字如錫東萊之昌邑人自少不凡以書
經選洪武甲子鄉貢入太學初授項城縣簿改清源縣
皆有愛民之政陞金吾前衛知事改龍江左衛蚤暮勤
職而才識明敏剴剔宿弊數出意見輔翼上官陞本衛
經歷上書論國大計太祖皇帝覽而奇之起陞工部右
侍郎特見信用太宗皇帝初臨御治齊黃離間之罪李
景隆於上前并指公為奸臣公厲聲言臣罪應死但目

為奸則非上知其正直不問遷左侍郎遂陞工部尚書
授資善大夫凡所陳奏悉見嘉納歲餘天下工匠集京
師者多疫死都御史陳瑛以為公罪劾奏之又不問初
建北京置行部時北方用兵累年民敝甚首改公為行
部尚書任之撫綏公據誠盡瘁植仆濡焦而民以蘇交
趾逆命遣大將軍率師討罪命公先詣兩廣治軍實調
度有方用足而民不困交趾平郡縣其地建都指揮司
布政司按察司總之設官民如制命公以尚書兼掌布

政按察二司印章而董其治公視民如子徇其所欲革其所惡勞之輯之訓之飭之躬勤不倦且戒郡縣邑吏咸修撫字之政吏承公仁無敢違戾公以新造之邦新附之民政令條畫靡間纖鉅悉盡心焉於是人並戴公如父時中朝士大夫以遷謫至者咸以見溫卹或者有疾病躬造視之拔其賢者與之共事及以教導其民而悉加禮焉中官馬麒怙恩肆虐自三司以下皆縮首斂避惟公數裁抑之麒誣奏公有異志上深照其妄曰此

君子不容於小人寢其奏公居交趾幾二十年仁宗皇帝登極上言六事悉見採用時初建諸驛召公還璽書有元老久勞于外篤念不忘亟欲見之之語瀕行交人扶老攜幼送公皆號泣不忍別既至深被獎勞賜白金文綺遂命兼詹事蓋付托之重云無幾仁廟上賓公董山陵之役宣宗皇帝嗣位馬騏澂變交趾時兵部尚書陳洽代公掌藩臬二司累奏乞還公蓋以交人思公之深公先已持節親藩冊封即日召還奉命復詣交趾時交

寇黎利據列城叛朝廷命將率師討之及公偕行將及境交寇拒師總師者失律為寇所得并得公寇皆下馬拜公曰公不北歸我曹不至此言已皆泣共置公於館父事之公度寇無悔罪意即不食冀死寇謹防護不去側竟禮送北歸既歸奉命偕平江伯陳瑄董江南饟運公與平江協心合謀績用有成公上言足食足兵省役三事均於時務並見嘉納宣廟念公春秋高久勞在外改南京戶部尚書上龍飛之初以南京根本重地公先

朝老成進榮祿大夫少保仍兼尚書叅贊襄城伯李景隆南京守備公時雖老事無巨細必周于慮而裁處適當襄城惟公言之聽文武諸司凡有疑務咸就正焉於時南京政肅民安蓋倚公為重朝廷下璽書事關機密者公必預焉賜誥命授光祿大夫加贈三代又上言學校田賦鈔鹽法官俸事多見施行正統四年冬得疾日加亟猶時強起議公務明年正月五日薨公卿以下奔走哭弔訃聞賜祭命有司治葬賢士大夫皆傷正人之

沒以為世道惜公自小官至一品始終以國家生民為
心常取希文語名其退食之堂曰後樂臨大事決大議
衆或媿姁公獨奮斷衆辟易公獨邁往人或善告樂
從如流斥奸闢佞無所顧忌下人有過多見優容所與
交游必輔於道憂國忘家老而彌篤所得俸賜率分姻
族屬纊之日室無百緡平生立心行事一以不昧天理
為主享年七十有八葬昌邑西新郭之原曾祖佑志祖
谷保考士中皆賜光祿大夫少保兼戶部尚書曾祖妣

倪祖妣李妣王皆贈夫人配王封夫人子男五璚琮琇
玕玕孫男二愷愷士奇與公同朝四十年晚辱公知甚
厚未薨之先歲餘予告歸江西道過南京公時有疾首
造焉躍然起執予手論國事娓娓不片語及他嗚呼言
猶在耳安得復見正直憂國如黃公也哉璚求書公墓
上之石敬叙而銘之銘曰維天之仁生賢與才上以輔
德下以康時士之高明誠道在我我祇行之其敢佚情
萊有黃公桓桓其資于道克明行之弗疑遭逢列聖既

五十載崇爵重秩踐揚中外靡遑夙夜靡間寢興闡智
畢慮顙顙用誠益下以惠益上以德敷厥謀猷亶時正
直凡民被疾猶痛在我民既有瘳我食斯下南交初附
詔公拊循育之訓之昭其春溫交人戴公曰我父母有
詔歸公如去恃怙肅肅其度內直外方不茹不吐推賢
薦能先哲所存後天下樂公實承之秉執有確國之有
公柱石在堂士之仰之如霍與衡爵圭林林疇並公志
遽不慙遺匪時之慨

明名臣琬琰錄卷十八

欽定四庫全書

明名臣琬琰錄卷十九

明 徐紘 撰

大學士文穆胡公神道碑銘

楊士奇

太宗皇帝御天下二十有三年文武之臣各展其才能
達諸事功若竭誠效力始終不渝者其身雖沒所以寵
眷之率有進而不衰其文臣遭遇之盛者文淵閣大學
士胡公尤著者也公初以進士第一為翰林修撰階承

直郎又明年太宗皇帝入正大統陞侍講踰月改侍讀
進承德郎永樂二年陞右春坊右庶子階奉議大夫仍
兼侍讀四年進翰林學士兼左春坊大學士階奉政大
夫進文淵閣大學士仍兼左春坊大學士又三年得疾
且劇上數命太醫集衆醫之良者往視日遣中使問疾
既卒上悼歎不已命工部具棺禮部賜祭者再贈資善
大夫禮部尚書謚文穆國朝文臣有謚自太子少師姚
公廣孝與公始也又命官給舟還其喪命有司治祠墳

時仁宗皇帝盛國南京公之喪過焉遣官臨祭賜賻甚厚塋畢其子入謝官其長子種為翰林檢討仁宗既嗣位追念公舊人加贈榮祿大夫少師禮部尚書遣官諭祭且厚賜其家公遭逢二聖恩備始終何其愈久而愈盛也公居官敬慎在上前承顧問應對必盡誠必據理而忠厚為本未嘗及人過失事於奉旨制勅視草即有所見必具可否以聞多見采納所撰進文字上知出公筆輒稱善所奏對語及所治幾務退未嘗出口雖親厚

不敢私涉有問蓋自守之嚴有素事太宗皇帝十有七年凡巡幸北京親征北方翰林率公與楊公勉仁金公幼孜在扈從信任甚篤禮部郎中周訥建請封禪羣臣亦多言此太平盛事上皆不聽時獨公之言與上意合既退作却封禪頌奏之丁母憂召還上問百姓安否對曰安但郡縣窮治姦惡外親為民厲遽詔罷之其兼春坊也小心盡誠多所裨益故尤為儲君所厚而沈靜謙約以滿為戒未嘗干人以私人亦未嘗以私干之兩考

京畿鄉試四為廷試讀卷鑑別公明奉勅修高皇帝實錄及五經四書性理大全書皆為總裁志於扶植名教獎掖善類果於義事於利不苟取與未嘗一比匪人所與交必輔之於善不善去之不復顧小人有不滿公者屢造言毀之賴上深知之不聽遽黜毀者而公自執愈堅意度蕭散雖身處榮祿未嘗一日忘山林幽澹閒遠之趣公退閉戶讀書賦詩而已初名廣廷試傳臚更名靖永樂初復舊名其字光大其齋居名晃庵因以為號

公十數歲喪父已有志問學內浸漬其母訓外則日受
從祖子貞先生之教故德器不凡居家篤倫誼處鄉曲
恂恂執恭讓既冠薄遊閩中閩之前輩君子率忘年與
交歸而從黃伯器先生講論得所歸宿之地而日進焉
其學博究經史百氏下逮醫卜老釋之說亦皆旁通而
用志性命道德之旨晚益有造詣為文援筆立就頃刻
千百言沛然行雲流水之勢賦詩取適其性情近體得
盛唐之趣工書法行草之妙獨步當世四方重其文翰

求者日接踵至雖無厭倦意然非其人不苟予其卒以
永樂戊戌五月八日春秋四十有九其先自金陵徙廬
陵宋忠簡公銓其十二世祖也曾祖鼎亨祖彌高父子
祺累官延平知府母吳元進士永豐縣丞師尹之子永
樂中贈公父翰林學士封母太宜人公娶夏初封宜人
洪熙初進封夫人子男三長即種次穆次穗孫男六所
著文章有晁庵集扈從集若干卷公與士奇同郡同官
知最深未卒前二年有後死則銘之約既卒其孤入奉

臨終之命索文刻墓石嗚呼士奇先公生五年豈謂竟
銘公墓哉蓋今九年乃克成之銘曰經國所資文武并
施維武以靖維文以治巍巍太宗統御九有任武暨文
如左右手公職詞垣十有九禩秉恭執勤司帝之制玉
冊金簡天章龍文光華日星敷宣帝仁萬幾燕閒清問
前席公所入告惟帝時懌公所蓄志寬惠被下沕穆泯
焉密贊鴻化春宮輔德平直之行二聖惟明燭鑒公誠
好文之朝儒林之首人聳其瞻公視無有泊虛之府簡

肅之度彼其何心有好有惡仲尼有言善者好之善之
好公沒思不衰寵章駢蕃貫終猶始始終之全曠代其
幾金螺在左文川在右埋壁有光上貫牛斗墓道之碣
為尋有多最行琢辭來者是儀

少保忠靖夏公神道碑銘

楊士奇

公姓夏氏諱原吉字維詰其先家于饒州曾祖復祖希
政元末為湖廣行省都事兵亂死之考時敏為湘陰縣
儒學教諭遂家湘陰公自幼端厚好學年十三教諭公

歿益知自勵母夫人廖守節教子公終父喪即出教里
塾取束脩以資養而率其二弟恭侍婉愉得母夫人懽
心出入鄉閭其老長皆忘年賓禮之時已負鉅人度喜
怒不形里少年嘗被酒侮慢公里人共擊之詈之曰汝
小人不知鄉有君子耶有鬼物白晝附人言禍福驚動
里中或強公往觀卒無所言他日復有言或問之故曰
夏公端人也吾不可以近公一無所動心洪武庚午歲
以詩經選鄉貢入太學遂擢戶部前四川部主事授承

直郎進承德郎曹務叢挫凡倉庫府帑之出入簡牘之
著悉有條理同官後至於事有未通者咸以質公日環
左右公雖紛冗必為之盡心蓋人人德公如師陞戶部
右侍郎授嘉議大夫巡撫福建所過郡邑考察吏治咨
訪民隱公明寬大人咸悅服太宗皇帝入正大統轉左
侍郎逾月陞戶部尚書授資善大夫永樂初蘇松諸郡
大水命公往治發浙西兵民十數萬疏決壅滯自松江
黃浦東北以達于海水患乃息而撫恤曲當人不言勞

又撫綏飢民奏發廩三十餘萬石賑之散給有方民賴以濟進資政大夫初建北京採宮殿材於東南命公自南京抵北京督視運送給以錦衣衛官校且命有不率命便宜行事公於號令中備矜恤之意人人效用太宗巡狩北京公預扈從命兼行在禮部都察院事歲餘車駕親征北方今上以皇嫡長孫留守北京命公輔導庶事修舉京師肅然太宗還良喜賜公鈔千緡綵幣四表裏羊酒鞍馬自是屢奉命侍今上有司奏公與吏部尚

書蹇公歷官九載皆賜勅嘉獎有淳良篤實如古名臣之諭太宗親宴之別殿無幾賜誥命追封祖考皆為資政大夫戶部尚書祖妣為夫人封母為太夫人重修太宗皇帝實錄命公監修書成賜鈔織金文綺衣文綺表裏北京宮殿成奉勅召仁宗皇帝及今上于南京二聖喜公至賜宴勞及鈔白金鞍馬北兵復擾邊太宗皇帝將親征公言今邊儲不足請遣將無煩六師忤旨罷官仁宗皇帝嗣位即日復公戶部尚書公以母喪未終辭

仁宗曰國家不幸有大事正朕與卿等協心比力之時如卿以親喪辭則朕亦未當在此公乃不敢復言遂加少保仍兼戶部尚書賜玉帶令上正位東宮加公兼太子少傅少保尚書二職如故賜誥命追封曾祖祖考皆為榮祿大夫少保兼太子少傅戶部尚書曾祖妣祖妣妣皆一品夫人賜銀章一其文曰繩愆糾繆且諭公曰朕有過舉卿但具奏來以此識之朕不難於從善賜鈔萬緡御用米二十石胡椒二百斤公感知遇之厚鞠躬

小心靡或不盡修太宗皇帝實錄命公監修仁宗皇帝崩時
今上監國南京至則喪禮及即位之儀皆具皆公一二人所
預定上既嗣大位公以舊輔尤重倚注公亦孜孜惟謹寵賚
日盛修仁宗皇帝實錄仍為監修庶人高煦反上親率六師
擒之公預扈從還賜白金文綺等物甚厚賜銀圖書一其文
曰含弘貞靜蓋褒公之德云明年扈從巡邊既還上念
少師蹇公及公等四人者皆春秋高欲優逸之賜勅嘉
勞命輟職務而仍其祿朝夕侍上備顧問謀議而恩遇

益厚兩朝實錄成賜白金織金羅衣文綺表裏鞍馬賜宴明旦入謝暮歸第得疾遂薨宣德五年正月二十七日也壽六十有五歲上聞訃震悼遣禮部尚書胡濙賜祭贈特進光祿大夫太師謚忠靖賻鈔萬緡勅有司營葬官其子瑄為尚寶司丞仍復其家朝臣自公侯貴戚下至郎曹將校咸往弔祭衛卒巷氓亦有嘆息至流涕者公天性至孝友其弟原啓原禮皆厚原啓沒愛其子如子讀書鄉校時教諭史九韶雖非授業師遇之必拜

雖貴不變既貴九韶陞教國子月恒分之祿九韶將老
朝廷從公請命致仕公與人交久而敬平生故人在患
難卒賙給之遇士之貧者振之有顛躓失所者援之德
雖微必報而未嘗存怨惡心接人溫然處事善善長而
惡惡短襟宇靜深閤廊不見涯涘嘗有從隸污公金織
賜衣懼欲逃者公曰污可浣何懼為有吏壞公所寶硯
石匿不敢見公召吏諭之曰物皆有壞吾未嘗惜此慰
遣之於時卿大夫雅量推公第一知者蓋比公於王子

明韓穉圭之度其在上前所言必歸仁厚臨政必酌大體其預宥密雖泯然無跡盖有陰受其德者矣故不問貴賤疏戚識不識皆知其為善人長者喜為詩四方士重公名得其一篇一詠藏以為榮公配鄭氏再封皆夫人子男三琉瑄瑾公卒之三月歸塋湘陰其家以墓碑屬予予與公同朝三十年晚益親厚相知又嘗為予道平生余豈意遂志公之墓耶銘曰沂夏厥初以國為氏衍于會稽綿綿厥系太末之邑後來徙居暨唐中和復

徙于番懿夏之陞逢掖其服詩書有承德善有績轉鄂
而潭自公祖考積厚必發公奮起紹燕歌鹿鳴來與計
偕官任其賢政用其才錄司徒屬暨掌邦教寅恭小心
寬仁允蹈叅決大議洵任重負不亟不徐雍容雅度如
彼喬岳巍焉弗移其氣默運澤潤良多祇事列聖既四
十載夷險一道其烏几几國有老成堂有柱石胡不慙
遺當寧興惻既榮且哀隆隆寵光於乎忠靖沒世不忘

戶部尚書古公神道碑銘

楊士奇

宣德三年二月十八日戶部尚書古公卒訃聞上遣進士康琰賜祭命有司給舟歸其喪且營葬事既葬其子本奉禮部尚書蔚公所述事狀走北京介少保夏公求書神道之碑余與古公同朝三十年知其有廉清之操諾而不辭公諱朴字文質號素軒古氏世家河南陳州諱義甫娶王生諱安道娶程公之大父母父母也以公貴公之大父父皆贈資善大夫戶部尚書大母母皆贈夫人公洪武中舉鄉貢為太學生奉命清理郡縣田賦

圖籍丁父喪歸服闋隸五軍斷事理刑遂奏家貧願仕
得祿養母太祖皇帝嘉之除工部營部主事授承事郎
迎母就養京師居無幾母沒官給舟歸塋服闋改兵部
司馬部主事陞武選司員外郎授奉訓大夫再陞郎中
授奉議大夫遂陞兵部右侍郎授嘉議大夫太宗皇帝
正大統轉左侍郎授通議大夫賜文綺襲衣上巡守北
京侍仁宗皇帝監國常奉命權禮部兵部及詹事府洪
熙中改通政使是歲陞戶部尚書授資善大夫賜誥命

追賜一代遂謁告歸省墓賜鈔襲衣公事親孝非其義
一豪不苟取居官臨事蚤作夜思勤勞弗懈一志於公
無敢干以私者謹守祖宗成憲不肯踰越或言事久於
時小過不及者亦當損益就中終不為動永樂中建北
京宮殿董伐木之役於江西有愛民之心竣事時被賜
賚戶部主事劉良素行不檢滿三載公考其績下良叩
上之左右人求公最考公曰貪侈之人幸未覺露不改
行終當敗最考不可得也良遂誣奏公他事既就逮繫

太宗皇帝燭其誣竟釋公他日吏部奏授良誥命封贈其父母仁宗皇帝曰豈弟君子福祿攸降是常誣奏大臣罪者其得為君子乎不與良卒以賊敗衆服公之明公所治職務退未嘗語其家人冰蘖之操確乎不移平素不事生產華靡雕琢之玩纖毫不畜公退清坐一室書冊自娛嘗病士竒往問之入其齋室幾案間獨有自警編一帙可以觀其所存矣洪熙誥辭有端厚簡靜操行清潔之褒蓋見知於上者深矣卒之日無銖累之積

以遺子孫男三瑄璟李本孫男若干銘曰古有恒言曰
公生明何道而公其惟廉清廉之為行士分內事曷世
由之什靡一二士行弗貞理曷由興嗟文質甫為廉有
誠厥廉伊何冰壺玉映迨其屬續室類縣磬紛彼貴仕
夏屋渠渠嗟文質甫歸兮焉居紛彼榮爵田畝阡陌嗟
文質甫歸兮焉食其履湜湜其心休休污者之嫉清者
之逮相彼貪人潢潦之溢崇朝而盈涸不待夕嗟文質
甫皦乎不緇永揚休聞其在斯碑

黔國沐公定遠忠敬王神道碑銘 楊士奇

正統四年三月十八日黔國沐公薨于雲南之楚雄訃聞上悼念輟視朝加降卹典遣官賜祭者再追封定遠王謚忠敬親王亦再遣祭其子護喪歸南京公卿文武羣臣及所過方岳大臣皆祭以薨之歲十一月廿六日葬江寧縣長寧北鄉觀音山先塋之次沐氏鳳陽定遠人其先所自具前翰林學士王景所著黔寧昭靖王神道之碑王之高祖考曾祖考祖考以昭靖貴皆追封黔

寧王高祖妣曾祖妣祖妣妣耿皆追封黔寧王夫人昭靖四子伯諱春襲封西平侯歿謚惠襄仲即王叔昂右軍都督府同知季聽駙馬都尉王諱晟字景茂自少氣宇閎厚端慤凝重聰悟過人而博學遠識恭慎寡言喜怒不形於色高皇帝重之既冠授後軍都督府僉事夙夜祇勤陞授特進榮祿大夫左都督時惠襄繼昭靖鎮雲南薨王嗣封西平侯仍奉命勅鎮雲南王承父兄之後秉誠殫慮益弘遠圖威服德懷恪勵夙夜先是麓川

不靖諸蠻遂宣慰使而分據其地王適至奏發兵平之
復奏以其地置孟養木邦孟定三府鎮沅威遠二州干
厓潞江灣甸大侯者樂五長官司而歲徵其貢賦又於
潞江之西置騰衝千戶所以控制之夷遂帖息太宗皇
帝臨御之三年八百蠻酋侵邊王遣將先率兵討之躬
率兵繼其後及蒙自縣蠻聞王來遂遁進禽其酋誅之
事聞賜璽書白金勞王四年安南叛命征夷將軍率兵
師及湖廣等都司兵討罪命王佩征夷副將軍印充左

副將軍率雲南等都司兵分道進討王率兵由蒙自經野蒲斬木通道以入先遣偏裨攻奪猛烈棚華闕隘賊徒悉遁遂築堡駐造兵舟分遣諸將出宣光江口奪渙沕寺沙鼻舟夜出洮水陣師遂遣將引兵沂流攻賊之富良江自旦鏖戰抵暮賊引却翼旦諸將皆欲奮擊王曰受命弔伐所欲得凶渠數人而已縱殺非皇上好生之心乃止遂造浮梁渡師時征夷將軍大兵亦至廼合攻寇之多邦城柵繼擣其東西二都及盤灘困枚嚕江

仙侶等冠悉破之冠首黎季犁父子狼狽棄其衆獨挈家屬及左右心腹遠遁于海王合征夷將軍兵追至日南州奇羅海口禽俘無遺械送京師凡得郡四十八縣百八十六戶三百十二萬五千九百獲象馬牛畜軍資器仗安南平六年春班師入朝賜號顯惠輔運推誠宣力武臣特進榮祿大夫右柱國封黔國公食祿二千石賜誥券玉帶金幣命子孫世襲既大宴上親製詩褒嘉又日賜宴于便殿還鎮雲南是冬安南餘寇攜貳命王

佩征夷將軍印總兵討之王師壓境寇遁入安海島
追至占城之境禽寇首陳李擴阮帥鄧容等送京師誅
之師還仍鎮雲南十七年富州蠻酋積逋賦不入朝廷
命王發雲南貴州兵討之蠻據險以抗王遣兵斷其後
諸將請急攻王曰威服不若德服遂使人諭以禍福蠻
即遣子詣京師謝罪悉償所逋仁宗皇帝嗣位重王勲
德老成詔兼太傅召至恩禮加厚遂命佩征南將軍印
還鎮宣宗皇帝初嗣位遣使齎璽書及金幣勞之皇上

嗣位恩禮視宣德之初明年改元正統賜金幣加厚是
年冬四川會川黎溪蠻各底泊等蠻為亂奏遣弟都督
昂討平之二年冬馬龍他郎甸蠻不靖復奏遣昂平之
三年麓川思任發擾邊侵掠騰衝南甸遣人諭之不下
秦躬率兵討之兵至潞江王勉諸將曰出兵尚謀不專
恃勇且逼瘴月非用武之時令官軍已集如賊能畏威
武悔過摠誠謝罪請命赦之斯亦可也遂復遣人諭之
不下乃命弟昂及都督方政等率兵前進王无戒其慎

重時王整兵在後政等乘夜度江破賊柵賊衆奔北官軍乘勢追至景罕等寨斬首三千餘級獲象三十餘政奮勇獨進賊伏兵四發政力戰死之時春已半王慮瘴發非官軍利遂旋師將駐金齒會有旨命王還鎮王至楚雄疾遂薨力疾革時顧弟昂曰吾父子兄弟受國家天地罔極之恩吾不能報矣吾弟勉之吾一家子子孫孫世堅忠誠保臣節無忝君親又顧昂曰斯役也雖偏將失利固吾總帥之過此賊必不可貸汝勉之勉之言

訖而逝歸櫬所過道路城郭無貴賤小大迂拜哀慟蓋
王在鎮久惠愛之被于下者深也王忠孝之誠本乎天
性無或弗盡與子孫言亦惓惓斯道友二弟甚厚教子
孫動以禮法家政秩然位極人臣而禮賢重士虛已聽
納寬裕有容未嘗面及人過凡文武屬治吏有過者惟
恐王知務自掩蓋其因自悔徙行者亦多王明於韜畧
然以仁為主蠻夷有罪未嘗輒加兵誅必諭導使改數
諭非悛乃奏發兵逮兵入境若夷能知懼罪亦曲貸之

與之更新雖臨陳必戒麾下毋縱殺戮賞罰明信威愛
並行至於完城池飭武備訓將士理屯田通水利實倉
庾恒謹戒法若輕徭賦問疲瘵尤勤致意學舍敝陋具
財僦工葺之不以煩下治公有暇手不釋卷稽古明道
動師昔賢蓋從容其文武之才仁義之師也配程氏追
封定遠王夫人子男一儼襲封黔國公孫男一玘至是
王之子以事狀求余書神道之碑謹按狀叙而銘之銘
曰天啓皇明于淮之右配天與地篤生帝后二聖至仁

作民父母心存萬方包含徧覆矧孤在里靡攸怙恃二
聖矜惻曰其子子鞠之誨之勞劬備周以長以成有偉
才猷帝有恩言爾復爾氏懋乃樹立華乃先祀嗚呼昭
靖盛德豐功皎日之誠持孝以忠嗚呼忠敬繼乃烈考
惟孝之執惟忠之蹈發軔都府簡在宸心夙夜弗遑秉
其慎欽往綏滇人幾五十年率考之行敷帝之恩俾食
俾衣免其寒飢重學崇師導之尊卑平其政令時其作
止人戴惠慈淪骨浹髓有或弗惠以諭以誨存誨弗悛

式劉以戒交人悖凶披猖為狂違天毒氓軼我邊疆奉
詔出師往行天討桓桓疾馳雷驅電埽富良飛渡如履
坦途兩師窮追縛寇海隅解縱脅從宣布教條爰整師
旅凱歌歸朝飲至策勛上公錫爵嘉寵元臣龍章輝灼
滇人之思瞻望旆旌帝不忘遠申命南行祇事五朝鞠
躬小心奉國忘家志如堅金寸棘未剪躬不寧處過自
偏裨于躬引咎終于王事德善孔多顯顯華褒千歲弗
磨沐世子孫奕奕象賢篤忠與孝永光其傳

惠安伯張公壙志

楊溥

公諱昇字叔暉今太皇太后季兄也世居河南永城高祖文銘曾祖景惠祖從義世以積善相承考麒以勲戚任指揮使追封彭城侯妣仝氏封侯夫人三代祖考皆追封彭城侯妣皆追封夫人伯兄杲襲彭城伯卒仲再襲仲兄旭府軍衛指揮使公初以城守功授義勇衛正千戶永樂三年陞羽林前衛指揮僉事調府軍衛七年授誥封昭勇將軍十七年隨駕北征二十二年陞後軍

都督同知洪熙元年陞左都督宣德元年宣宗皇帝征
武定州三年巡邊俱命公守北京四年上優禮至親命
輟左府事朔望奉朝請凡朝廷有大政事亦預議後奉
太皇太后命弗預正統五年九月封惠安伯授奉天翊
衛宣力武臣特進榮祿大夫柱國歲祿一千一百石賜
誥券子孫世襲六年正月十三日以疾卒壽六十有三
訃聞上深嗟悼輟視朝一日遣官諭祭勅有司賻葬太
皇太后遣官致祭以是年二月某日葬宛平壽安山先

塋之次公為人端重孝友之德夙著于家閨門整肅教
諸子有方平居簡默臨事卓有定見歷事四朝公勤忠
謹未嘗有過宣廟為皇太孫時往來兩京及時侍太宗
大皇帝北征皆命公保衛出入起居深有規益退而未
嘗形於言宣宗以保衛功嘗欲加封爵固辭其居顯官
恒自謙抑每陞拜祇畏如不勝其臨政事必咨詢同官
審擇而行不恃已見與人交尚道義遇文學士必加禮
敬服食尚儉素不為富貴態而急於利人常蓄藥石以

療人疾為糜粥以濟飢歎公餘留心載籍至老不倦往古治忽及忠臣孝子事皆能道其詳每遇事輒以訓諸子嘗燕居諸子侍適雷雨暴至公肅然起敬曰語云迅雷風烈必變學者不可不慎臨終召諸子語曰吾素無功德朝廷篤念親親與高官一家祿食莫能報稱喪事不可干朝廷宜從節儉依文公家禮無作佛事無徇世俗為葬儀費財勞人無久停柩于家毋煩費親戚朋友葬宜深坎毋高為墳塋吾所注意者不幸長子蚤喪孤

孫數人諸子宜加保愛爾等能體我心則為孝配王氏
封夫人子男六長軫襄府典寶次軫次輪府軍左衛指
揮使次輦次軫次輦軫輦先卒女六人長適劉濬威遠
衛指揮使次適唐彥金吾左衛指揮同知次適李紀燕
山右衛指揮使次適山俊府軍前衛指揮使餘在室孫
男八人女闕人嗚呼前代勛戚賢否得失具載信史世
為勸懲若公者可謂生順死安生榮死哀者矣雖沒以
中壽而不忘者遠爰述其榮用納諸壙以示永久云

冷面寒鐵公傳

彭森

公姓周初名日新在國初受知太宗文皇帝嘗獨以新字呼之遂更名焉字志新世為南海人居郡南郭外之高第里永樂甲申拜監察御史彈劾不避權要凡知無不言而言無不盡雖屢犯天威公言愈懇切不少變貴戚皆畏之目為冷面寒鐵人因稱之曰冷面寒鐵公公初為郡庠生負入太學有時名入選授大理寺評事以剛直著讞獄平允莫有稱屈在列咸推遜焉每有疑獄

必決之公公一言而白至是轉風憲風裁益揚人競相
畏或紹小兒曰冷面寒鐵公來皆匿已而擢雲南按察
使未及蒞任有任轉浙江有寃民逮繫數載聞命下喜
相告曰冷面寒鐵公來也吾屬無患矣公至洗其寃放
之有一巨商遠回未抵家而日暮恐孤行為人所剽掠
潛以其貲置一祠石下至家妻問之商告以故明日求
之無有也以公神明往訴焉公曰是必而妻有外遇也
覈之果然蓋歸語妻時為姦人所聽而是夜先往取之

矣其燭姦如此境中暴虎嘗害人公為文告城隍湏臾虎詣伏罪格殺之初來行道上有蠅蚋羣聚馬首尾之見暴屍一軀無他物惟一鎗及小木私記收之及至令人市布取入比印號不同者即發還已而得同號者鞠之乃刼布商賊也悉以其贓召布商家人給之家人大驚時商去已二載於是始知為盜殺也為政多類此它如辨豆獲盜人皆服之嘗巡屬縣易服色入觸縣官收繫獄中遂知一縣疾苦明日迂公乃自獄出縣官恐懼

伏謝竟以罪去由是諸郡縣吏聞風悉股栗莫敢肆其
姦察案一日以驚炙餽公公懸之後有遺者指示之無
復有以毫髮干公其察案有受遺者必問冷面寒鐵公
知否公未顯時配夫人嘗治褥以給及此偕來淍處如
貧日無難色同僚私屬內燕公夫人往荆釵布裙大類
若田野婦各歸漸慙遂更相變為澹素公雖處家儉樸
而轉移人若此脫大柄用而侈聲樂不為之減者少矣
朝廷命錦衣千戶如浙拿賊吏郎受吏賊公時進須知

遇諸涿州捕之繫于涿獄千戶逸走詣闕奏上上怒令
馳驛縛至既至伏丹陛下猶口口歷陳其罪不已上愈
怒命肆諸市臨刑大呼曰生得為直臣死當作直鬼是
夕奏文星墜上大悔枉了好人不悅者久之問左右曰
周新何許人對曰廣東上曰廣東有此等好人自後嘗
見形于朝或見一人衣紅衣立日中上呵之問為誰對
曰臣周新也上帝以臣剛直命為浙江城隍為陛下治
姦臣貪吏言已不見天顏慙然公少鯁直勁厲姿幹高

大俊偉異常好學能文尚凌厲在童子行而氣宇凜若
成人人無犯者有小挫必奮奮不平必直之而後已在
庠校同列有過則面責至人無所容人以公為太甚輒
抗聲曰責善朋友道苟阿諛胡取友為有過者即改恒
恐公知之蓋其養可知已為政尚大體問無明事斷如
神人以為生閻羅姦宄潛伏羣吏膽落民無犯令犴圜
皆空然尤愛恤小民惠澤草野雖三尺童子皆頌其美
至今閩廣父老猶解說其事公沒夫人獨挈公遺衣及

遺書數卷歸廣貧居如洗然新昌楊公信文去歲來南
巡撫時存問其家每月周之以奉嘗語人周志新當代
第一人吾黨所未及也森於公同里為叔行且蚤知於
公今公死慮歲久湮沒因暇筆其粗梗以識其為人或
為公發姦摘伏有廣漢風而宋有鐵面御史公似過之
故因當時之稱傳之曰冷面寒鐵公云

明名臣琬琰錄卷十九

欽定四庫全書

明名臣琬琰錄卷二十

明 徐紘 撰

都御史向公神道碑銘

金幼孜

公諱實字克忠姓向氏別號疎菴其先河南之開封人
宋僕射文簡公之十五世孫也文簡四世係蔚嘗扈蹕
從宋高宗南渡子水性仕孝宗累官大中大夫封魏國
生仕煜官朝奉大夫朝奉生公道為臨川縣丞娶進賢

許氏遂以朝奉葬其邑潤安因家焉自是為進賢人祖
雲翔父允恭以公貴皆贈資善大夫都察院右副都御
史兼詹事府詹事祖妣張氏母熊氏皆贈夫人公資性
穎異五歲能頌孝經七歲通四書章句過目不忘稍長
肄業邑庠教諭丁之翰授以書經甚見器重嘗從邑人
假通鑑綱目七日即遣還之間舉以問荅之如響洪武
甲子科舉復行遂以書經薦于鄉明年登進士第觀政
都督府丙寅授庫部試員外郎丁卯實授職方員外郎

奉議大夫壬申登丁外艱明年詔起復仍前職丁丑秩滿陞通政使以不善奏對力辭改應天府尹階嘉議大夫戊寅坐事謫廣西蒼梧甲申太宗文皇帝入正大統復公前職己丑以譴逮獄憲臺庚寅冬左選兩淮都轉運鹽判官未幾復訟繫南京乙未春宥復前職命督運糧餉并總督淮安諸郡漕運材木甲辰秋八月仁宗皇帝即位驛召還朝上方欲擢用公適交趾缺按察吏部首以公為奏上未許之遂以為都察院左僉都御史翊

日入謝陞右都御史階資善大夫未幾復命兼詹事府詹事特賜楮幣羊酒公雖屢見挫抑而志於有為到官不數日即條陳八事以進其一曰錄用勲舊二曰設置諫官三曰選舉賢才四曰簡練將帥五曰貴重有司六曰考覈吏員七曰監生資格八曰疏通鈔法其言皆懇切有裨於時政者上命次第行之今上皇帝即位之初以南京都察院缺人特命往蒞焉宣德戊申夏秩滿入覲公時以嬰疾艱於拜跽上念其老特賜勅令致仕歸

其鄉然自是疾益加劇遂以八月四日卒于南京之官舍訃聞上悼歎之特遣使賜祭命官給舟還其喪復命有司治祠墳以其年十二月丁酉塋潤安九世祖朝奉公之塋公生元至正丙午六月九日至是享年六十有二娶羅氏封夫人子男五長劉孫次可觀可規可靚可寬噫公為人清介公方歷事四朝逾四十年初居庫部職方時公牘日累千百次第剖折並無停滯衆皆推其勤慎及為京尹愷悌廉明興學育才恒加督勵撫善推

恩強暴悚懾公庭肅清終日不聞鞭箠民皆感服及居
憲臺振舉紀綱以德濟威嚴而不苛士論多之屢遭黜
斥辭氣浩然未嘗少屈所至輒開館延士觴詠賦詩未
嘗以夷險易其志故廉厲端確之行始終如一日性至
孝嘗以祿不逮親為歟時忌日悲泣如初喪奉繼母不
違其志撫諸弟友愛切至處鄉里恂恂自下交友朋恭
謹謙抑久而益薦平居言不及禍財不苟取與疏食水
飲自處泊如其學博究經史百氏為文章有理致詩雅

健可愛有疎菴日稿若干卷學者稱之為疎菴先生云
銘曰猗歟向氏文簡之裔魏國繼之益顯其世逮于朝
奉實葬南昌公紹厥緒閱閱煌煌公年弱冠名薦南宮
祇事列聖太祖太宗泊于仁考歷濟顯融啟踐中外有
聲颯颯公在官守執勤秉恭寬惠愛人卹于瘡恫公有
言責勵其清忠不撓不激雅度雍容公志之篤操履之
堅夷險一致隨遇而安公老致仕始終克全公歿有榮
無憾九原士論所歸如公有幾匪公之能惟德之比匪

惟有德而又有子圖其不朽屬銘太史最行琢詞揭石
墓道後千百年其永有耀

顧都御史言行錄

楊 廉

顧佐字

闕

河南太康人中進士歷仕洪武宣德間官

至左都御史除莊浪知縣午節會射將佐以文士易之
公連發三中無不驚服尋擢御史守正嫉邪為應天府
尹剛稜不撓吏民畏服勲豪貴戚為之斂手政聲赫赫
議者謂類包孝肅之知開封府宣德三年六月中早朝

罷召楊榮及楊士奇問廷臣中誰可使掌憲兩人久未對上曰未必都無一人臣士奇對曰通政使顧佐廉公有威曾任御史及按察司皆有風采帝曰佐亦嘗為京尹能防禁下吏政清弊革上喜曰顧佐乃能如此陞右都御史賜璽書令考黜不肖洗滌積弊佐奏黜其不肖者二十餘人宣德四年顧佐自陞都御史憲度嚴明宿弊清革下至吏卒悚惻凜然吏有遭笞者据佐之過謂受皂隸賂放歸悉具姓名以聞上宥以示臣士奇且曰

爾不舉佐廉乎對曰所訴之事誠有非誣蓋今朝臣月俸止給米一石薪炭馬芻皆資於皂不得不遣半歸使備所用皂亦皆樂得歸耕實官皂兩便此京師大小臣僚皆然臣亦然

自永樂以來如此

仁宗皇帝固知之所以增朝

臣之俸上歎曰朝臣之艱如此因怒訴者曰朝廷用一好人輒為小人所排欲下法司治之臣對曰此末事不足上干聖怒但付佐自治恩與法并行矣臣退上召佐以吏訴狀授之諭之曰放皂隸耕使給薪芻京官皆然

不足為過小人不樂檢束誣陷正人汝自治之佐叩首
退召吏示之狀吏恐甚佐曰上命我治汝我姑容汝但
改行為善竟不治之上聞之喜曰佐得大體矣數月有
囚告佐累累枉人重罪不聽訴理者上大怒召楊榮及
臣諭曰此必有罪囚教之排佐小人陷正人不可不究
治遂命三法司鞠之實千戶臧清殺一家無罪三人當
死代寫狀教之誣告上曰不誅之佐何以行事立命磔

清於市

並聖
諭錄

金史卷之二十一
卷二十一
顧都御史佐性嚴重聲望偉然未嘗口毀譽人旦晚東
朝房小憩前呵雙藤立戶外官僚行道以此為驗往往
有輓驢駐馬折而還者雖公遭時得君之盛要亦有惛
伏彈壓之實焉

午門外東直房六部都察院堂上官候朝之所兩門入
惟都察院正官獨處一小夾室近歲都御史顧公佐非

公事未嘗與諸司羣坐

並水東
日記

太康之墟卓有良臣烈烈汝介匪矯而真高簡不接一

榻凝塵尹正天府明察如神擢中執法實來縉紳赤捧
生氣公論以仲事歸臺閣弼于一人

彭韶
撰贊

大理卿虞公言行錄

尹直

虞謙字伯益鎮江金壇人仕洪武宣德間官至大理寺
卿公自幼秀朗端重聰敏好學洪武乙亥由太學生擢
刑部山東部郎中陞杭州知府永樂初召為大理寺左
少卿尋陞左副都御史甲辰春轉大理寺卿恒曰為臣
之道愛君愛民二者愛君崇其德愛民厚其生為副御

御史奉命巡視揚州淮安旱災至則疏民所苦請發廩賑貸官為贖還所賣男女為奴婢者皆從之入奉命督兩浙蘇松諸郡運賦建議丁多而糧最少運北京丁多糧少次者運徐州丁糧俱中運南京淮安丁少而糧多存留本郡縣倉又奉命巡撫浙江察廉糾貪建議便民十數事多見施行仁宗皇帝既嗣位欽恤刑獄而嚴大理之選曰是天下之平也於是改公為卿先是都察院論驅騙罪准洪武榜例臬首公言比奉詔書自今准律

斷罪誣騙在律當杖而流梟首非詔書意上曰虞謙言
是天津衛倉災焚糧數十萬御史廉視言主典者盜用
故縱火以自蓋追逮幾八百人不勝考掠皆誣服應死
者百餘人公察其冤白于上得減論於兩法司及四方
所上獄議皆親閱之必當必平於大辟罪尤加意曰彼
無憾斯我無憾矣時有詔求直言公言七事其一用人
曰用得其人則治道興非其人則治道墮人主之職惟
在擇人而已其二興學校曰教育之道本於師範不在

於備而在得人庶有成效三曰都察院耳目紀綱之職
用以激濁揚清今專俾治獄非設風憲本意四曰廣儲
蓄今國用空乏宜預為備五曰北京八府之民困於養
馬宜分給無馬郡縣牧養以蘇圻內六曰鈔法不通由
於出多而入少今但多方收之而不輕出民艱於得鈔
則自流通七曰京師盜賊之繁由於軍民工匠每十家
編為一甲使互相覺察出入一家有犯十家連坐有能
捕首免其連坐之罪皆切中時弊公儀觀偉然瀟灑絕

俗以詩名於時有玉雪齋稿喜寫山水木石有倪雲林

韻致宣德二年卒年六十三

並楊士奇撰墓碑

尹直贊曰蘭臺

棘寺刑乃攸司惟公廉平仁廟簡知遂自郎署擢都憲
紀歷愷多年累效勞勩讞議平反惟慎惟明敷陳剴切
允愜輿情

工部主事劉公言行錄

尹直

劉李麓諱韶字季麓以字行浙江餘姚人進士歷仕洪
武永樂間官至刑部侍郎左遷工部主事

君自幼端靖喜學問既承其家訓長而進學登洪武甲戌進士第授行人司行人嘗持節使雲南四川朝鮮所至宣上德達民隱餽一毫無所受事聞上賜鈔襲衣丁丑陞陝西布政司左叅政先是陝有逋賦民積歲不能輸有司峻刑督之君至慨然曰民困不能輸為之父母又忍峻刑督之耶與其察謀分行郡縣解其繁緩其期勞來綏輯而從容勸誘焉民皆感激曰是赤子矜念我我可不戮力以累仁人奔走假貸以輸無幾畢完

陝不產礪砂而歲月有課額民窘不能償至或債其家者君為奏罷之

洪渠水溢為民患躬行視之為設法治堰民賴以安蓋凡可以利民者率盡心焉

召為刑部左侍郎尤憫憫重民命平反其獄數事陝平民王某為強盜所引逮至而所引者已伏法不能自白君察寃召所引者之妻子使識之而聽其詞竟得實王免於誣有典守錢穀而虧兌者既被逮則援引千餘人

同罪君廉知其誣卒辨所誣引者釋之河陽逆旅夜有朱趙二人異室而宿朱怨家後追至而誤殺趙朱實不知逆旅主人疑朱殺之追執送至鞠訊考掠朱遂誣服不敢求辨君獨曰是偶邂逅相聚非素有負且計其裝非有圖也特緩其獄遣人密察之無幾有司竟得殺趙者而朱以緩獄不死揚州民胡氏夜有賊入其室殺人而遺刀屍傍旦視之柄有隣家蘇氏私識官捕鞠蘇蘇曰家失此刀久矣不服既備極諸刑竟無服君潛使持

乃往察其隣一童子識之曰我家物也遂得賊而釋蘇
盖其理刑一以求生為務永樂乙酉纂修大典命太子
少師姚廣孝禮部尚書鄭賜監修而擇有文學者一人
為之副遂以命君討論裁處人多服之庚寅坐失出人
罪左遷兩淮鹽運判未行復改工部營繕主事躬勤治
職未嘗以崇卑為意癸卯卒年六十一君為人清素雖
復歷顯要而泊然自待雍容雅度有犯不校閒暇手不
釋卷治經長於春秋喜吟咏冲澹優閒有陶靖節韋刺

史之趣

並楊士奇撰墓志

尹直贊曰有學有行風度醞籍早擢

甲科使車屢駕于蕃于宣有裨上下入佐秋卿恪勤夙
夜祇體欽恤隱鬱舒達寧失不經寧職可罷厚德永垂
崇卑奚訝

刑部尚書趙公神道碑銘

楊 榮

天之生才特以資於世用然必國家有以教養之於未
用之先歷試之於方用之際及其練達既久而後大用
之以盡其才故能建功立業進退協道足以震今而耀

後焉若故資政大夫刑部尚書河南趙公蓋其人也公諱珙字雲翰其先為邢臺鮮于社人元季擾攘公之父攜家避兵於平陽夏縣而公始生時寇出四掠公在襁褓母嘗抱匿林莽間迫於虎置公于地虎熟視而去聞者異焉世靖將歸邢臺道經于汴閱其風土而樂之因家于汴遂為汴人公自幼穎敏嗜學進退動止屹如老成既長游學郡邑庠已卓然于儕輩中洪武丁卯由郡薦入太學生嘗被命董事山東以克廉謹受襲衣楮幣

之賜歲庚午授兵部職方主事命覈天下兵馬暨諸路屯戍補其缺而增所宜置公得其實具圖以進太祖皇帝以為能己亥陞武庫員外郎慎密小心尤為當道者所重戊寅陞浙江右叅政剗繁治劇事無少凝滯時海寇出沒劫取人財公以計捕之境內獲安尋丁外艱吏民慕之如離父母太宗皇帝嗣臨大寶以公能專對命使南交至則誕宣德音恩威兼布夷長款服既歸却其金寶之餽太宗聞而嘉之錫賚優渥擢刑部右侍郎未

幾轉工部再轉禮部受命往封西寧侯宋晟歸拜禮部尚書賜宴于華蓋殿并徹御筵饌羞遺其母以榮之戊子仁孝皇后崩逝公詣北京卜山陵告成膺楮幣之賜壬辰督創隆慶保安永寧諸郡治撫輯有力而新集之民悉其業而不知其勞丁酉改兵部尚書明年以內艱去已而起復專理塞外兵政疾作太宗遣中官偕名醫往視疾已入謝復令調攝于家既康復命詣塞北訪牧地遂具順川等處以聞于是出廐馬牧之孳畜蕃息壬

寅大駕北征命公督軍餉措理有方兵食克給仁宗皇帝嗣位改刑部尚書居職六年式敬由獄宣德庚戌力以疾辭宣宗皇帝矜其賢勞特賜致仕既歸汴構一室於東郊名曰石泉茅屋日與親友為歡以樂暮年正統丙辰七月十有五日以疾卒于正寢享年七十有三訃聞上遣官諭祭仍命有司營葬公生乙巳某月某日曾祖諱某有隱德祖諱和之父諱得以公貴俱贈資政大夫刑部尚書祖妣張氏母侯氏俱贈夫人配胡氏封夫

人子男四長曰愚舉賢良方正授潞州襄垣縣丞次魯次純次樸女二孫男五瑄瑛玘琮珍孫女五以是歲八月廿有三日塋公于祥符南百畝岡之原愚奉都御史顧公佐所述狀來京謁予泣拜請銘惟公儀度英偉倜儻多才善屬文喜歌咏有倉父集二卷藏于家嗚吁士君子出處進退求合乎道而已觀公之仕于朝也據誠效勞知無不言每有獻納多契上意雅性節儉雖貴列六卿而自奉澹泊及退居也幅巾藜杖蕭散自如不以

外物經心公之進退協于道者如此是宜有銘銘曰於
皇太祖建學育才士習丕變人文聿開巍巍趙公遭值
明世肄業泮宮用成大器學優而博識敏而明列職內
外式殫厥成明明太宗惇信崇德擢任亞卿旋拜宗伯
直清寅畏夙夜惟勤和厥上下治茲神人乃遷司馬克
詰戎政兵食之充畜牧之盛伊誰致之實公之為中外
咸曰任公其宜邦禁之司仁廟之命昭哉五刑惟恤惟
敬國有六卿公歷其三僚屬具瞻泰山巖巖公仕四朝

終始一節既老而休允矣明哲維公之賢生榮死安作此銘詞以永後觀

右都御史王公神道碑銘

楊 榮

國朝稽古為治用人之法惟舊是圖列聖相承率由茲道於是耆德宿望之臣歆歷中外游躋顯要以至持衡秉鈞先後數十年榮名始終者往往有其人焉何其盛也乃宣德二年夏四月朔日都察院右都御史王公以疾卒明日上賜之棺具命禮部遣官祭之兵部給舟車

歸其喪有司為治墳塋越月其孤瑾奉監察御史羅汝敬所述公之行狀詣予泣拜請曰先公既歿將祔塋鄭之城西南先塋之次然無文刻于墓石恐遺德弗傳敢請一言以示于後庶幾永有賴焉予於公同官于朝交久且厚誼弗可辭按狀公諱彰字文昭其先世家太原代有顯人其後散居四方皆為鉅族公之高祖諱資元至正中以明經為河南鹿邑學官因家焉曾祖良祖賜父汝能皆樂善好義居鄉有聞母郭氏元季汝能挈家

避兵汾晉之間海內既平將歸其鄉過鄭樂其風土遂
占藉焉公生元至正丙午九月十八日幼穎悟好學稍
長有司選為州學生益自刻苦學日進洪武丁卯領河
南鄉薦明年會試禮部弗利補太學生嘗使山東平糶
以實軍儲同列納賄縱逋負者公毅然責之弗聽比還
其人果得罪公遂以廉幹聞明年擢吏科給事中典封
駁之任夙夜在公出納惟允歷左右給事中益慎益虔
聲譽无著遂進都給事中未幾陞刑部福建司員外郎

時有豪橫往往搆訟根株連結至數歲不能斷決有司
卒為所誣害公曰法貴平恕然亦豈宜寬縱以長惡哉
于是正之以法而為所誣者皆得釋人咸悅服既而超
拜山西布政司左叅政居藩七年吏弗忍欺民懷其惠
永樂初召拜禮部右侍郎階嘉議大夫時四方萬國奉
玉帛重九譯以朝覲賓貢者肩皆相望于京師賞賚燕
享無虛日與尚書鄭公賜同德協恭奉職惟謹明年以
父喪去官哀毀踰節鄉鄰稱焉服除遷戶部嘗祀華嶽

過陝州之新安聞民鬻男女償逋租既還奏之詔悉蠲其租且官給楮幣以贖其所鬻男女人皆德之永樂壬辰改都察院右副都御史論事嚴毅持法公正人不敢干以私嘗以母夫人年高欲歸省侍而難於請適蒙恩命按河南許其過家且賜母夫人冠服仍給白金楮幣以歸為壽時人莫不歆羨歲庚子陞右都御史秩資善大夫仍按河南待諸鄉舊一如平生至於公法雖親不貸時諸郡連歲水患民多流亡而有司復加重斂民益

以因公悉奏之於是詔停不急之徵十餘事凡官吏以貪暴罷免者九百餘人招流民復業者幾五萬家發官廩以振之賴全活者甚衆先是強賊張大聚亡命嗟我山行劫商賈為之不通女僧宋繼善與其徒數百人為妖言惑衆奸人李人美以左道惑人公悉捕斬之平生嫉惡甚然微有所疑者必反覆訊鞫然後決有鄭旺者罪當辟公閱其辭疑焉命御史為辨之果得不死公性至孝以父早世事母夫人尤謹在京師所得四方珍味

必遣人馳獻然後敢食歲時薦先竟日悲哀不樂所得俸祿必分族人及濟貧乏嚴於家法訓飭子弟其有違禮度者必痛責之俟其悔悟乃已洪熙改元進咨政大夫得推恩封贈其祖考皆如公官母封太夫人咸以為榮公卒之日士論嗟惜之配郝氏有賢行封夫人子男二長即瑾次瑜女四公為人簡靜待人以誠率下以正平居言若不出口至臨事論辨詞氣侃侃弗少置自為侍從之職薦躋顯要歷事累朝廉介自將恪勤夙夜垂

四十年毅然有古大臣之風若公者庶幾無愧於其職也歟遂為序次其平生行能之槩而系之以銘其辭曰王出太原世有聞人維遷鹿邑閎閎嶙峋迨于高曾家聲益振元季兵興避地汾晉幸際聖明桑梓是思爰樂鄭鄉占籍于茲公承厥後早悟而通發迹場屋遊歌辟雍列職內廷實典封駁優游禁近薦膺顯擢既遷秋官持法惟平出佐山西藩方實寧公來自藩乃貳宗伯維贊司徒厥聲藉藉秉憲內臺風軌肅清白髮蒼顏翼然

在廷弗規弗隨正色率下從容廟堂贊輔聖化惟公克
忠廉謹自持惟公克孝祇奉母慈薦沐國恩膺此褒典
光子三世無間幽顯公宜壽考寵眷是承云胡逝矣溘
爾遺榮公則無憾世迺嗟惜邦失重臣人懷舊德蒼山
峩峩為公之墳百世之下尚徵斯文

禮部左侍郎陳公墓志銘

王直

陳氏之先汴梁人宋建炎間有諱譽者為嶺南清海軍
節度使終於官子宴廕東莞令因家邑之延福鄉由是

為東莞人公高祖祖舜曾祖誠子祖用廣父宗彛皆不仕宗彛娶翟氏生四子公其長也諱璉字延器別號琴軒自幼聰敏喜學從邑庠訓導黃先生勩受書經學成領薦會試不偶入太學選為桂林府學教授嚴明條約以身先之時有詔武臣子弟皆受學公日進諸生講聖賢之道所謂忠孝仁義之說必使身體而力行之諸生雖文武不同莫不皆有所得都督韓觀總兵鎮守廣西猛悍不下士聞公之教心悅誠服每以儒師加禮焉秩

滿陞國子助教永樂初近臣言公有治才不宜置之散地召試在優等擢知許州始至人以儒者易之公少有警發衆為悚懼乃更以寬厚寧民未幾代還改滁州均徭役時征歛禁奸戢暴民用太和太宗皇帝巡幸北京所過先遣廷臣察吏治問民隱治有異效者加陞擢焉衆皆言公績最滁人恐失之詣闕乞留遂陞揚州知府掌州事賜綺衣一襲鈔五百貫禮部宴餞給驛遣還在滁入九年陞四川按察使四川去京遠民不畏法豪吏

黠胥姦弊百出公至一治以法不少貸軍中暴橫有號
虎彪太歲者人莫敢犯犯輒受奇禍公廉得實為設方
畧密遣人捕之皆置之重典而人以寧乃建言修武備
慎刑罰明禮制復義倉正風俗等九事上嘉納之召還
改南京通政使出納命令罔不明允上喜其盡職賜之
誥命以示褒而曾大父大父父皆贈通政使妣與妻皆
淑人正統初特調南京禮部左侍郎於稽古禮文之事
尤惓惓不少懈又五年以年踰七十乞致仕上許焉公

德行淳懿文詞典重人愛之若拱壁其所進於上有巡
狩頌平蕃頌饒歌鼓吹天下傳誦之縉紳士大夫求碑
銘序記詩賦諸作以發德述懷娛情寫物者足相躡於
門公應之如響故所作最多今傳者有琴軒集歸田藁
若干卷尤好著書凡所臨郡邑必采其山川人事風俗
物產所以供賦稅之正而適上下之宜者為書以傳若
潁川永陽羅浮成都等誌皆具存其識鑑精明取舍不
妄賓興之歲公必在主司之列而收得人之譽及致仕

而歸鄉之學者有所增益郡縣守令政有未達者得咨
度之於公黃肖養作亂其所以制禦綏靖卒保無恙者
公之策為多公生於洪武庚戌五月初七日而以景泰
甲戌十月十六日終享年八十五配淑人袁氏有婦道
先卒又娶侯氏子男二鼎鼐孫男二鎧鑑將以明年二
月初三日奉公柩與淑人合塋焉塋宜有銘以公之友
左副都御史致仕羅公亨信所有行狀來請予嘗托交
於公知公文行政事之善且與羅公同年又知其言足

以取信於後世誼不可辭乃為序次而銘之銘曰東莞
陳宗來自汴梁武德桓桓奠此一方傳至于公益篤大
藝奮迹泮宮遂領民事今之太守乃古諸侯千里滁陽
賦役優優繼登外臺克謹邦憲政肅刑清俗為之變典
教成均學者有師執事之樞出納具宜維少春官禮樂
是輔帝實用公公乃求去白髮蒼顏老于故鄉賢哉二
疏千古相望山川出雲雨彼黍稷功成歸來孰知其力
公今逝矣與汗漫期有美在人百世之思

明名臣琬琰錄卷二十